

四庫全書

集部

欽定四庫全書

文忠集卷三十一

省齋文稿三十一

宋 周必大 撰

墓誌銘

右廸功郎致仕劉公若川墓誌銘

乾道元年

隆興元年十二月一日廬陵鄉先生劉公卒州學教授
師生員哭其家甚哀郡人皆嘆曰善人死矣于是門生
鄉貢進士田亮功會萃遺事屬某為之銘某之兄弟昔

以童子受業公問其何以辭公舊名武字定功後改名
若川字朝宗世為廬陵人曾祖海祖惟一皆不仕父陶
字紹先博學有聲稱于勢利泊如也其詳見文人葛敏
修李聖功所為銘紹先娶樂氏實生公公自幼刻意讀
書事父母益孝待兄弟以順方三舍法行為正若錄必
經衍行誼俱優者當是時公固未老人已曰非劉公不
可其後改科取士又曰劉公元祐宿學也宜留為吾徒
師中間預鄉薦可以仕矣公優游學舍不起也諸生亦

謂公言行可法相與挽之不置蓋贊助學官表帥多士
踰四十年平居與物無競休休然真寬厚長者人以是
敬愛之若乃施口惠任心術以沽流俗之譽者固公所
恥也家素貧學者聞其名自遠麋至賴以自給公損衣
節食推其餘以字育孤幼調恤朋友此又人所難者紹
興二十九年太上皇帝慶壽於慈寧宮凡高年以差賜
爵時公年八十七且有子舉于鄉實應詔書遂補右迪
功郎致仕初公屢求解學職衆輒留之至是欲必去衆

曰公耳目尚聰明况養老于學古之遺制也不聽蓋復
留四年以疾卒于家公為文醇正淡泊如其為人
有集
二十卷娶夏侯氏再娶王氏彭氏四子長充實通經篤
行有父風次充國鄉貢進士次待問以毀卒次定國二
女長適進士彭邦直次適進士王景先前卒孫男女俱
九人男鄉貢進士羲之暨麟之釋之涓元之揮儀之宗
之必勝也曾孫男三人伯雄伯魚伯鳳皆業儒女二人
議者謂公豐積而嗇取後世殆其昌乎諸孤以二年十

一月辛酉葬公于城西雞家嶺與彭氏同兆而異穴銘
曰九十一年不其壽子孫濟濟昌乃後天豈我私躬自
厚如唐師德漢少游無競無求以自首附郭之山長而
秀公歸其宮安且久列辭鑽石耀不朽

蔡子亨墓誌銘

乾道元年

伯父沅陵公好賢喜士其規模寧與時利相反一時巨
室衆方慕嚮有來請交多捨去不顧即故家若寒士人
所蹈藉者往往察其賢延譽之仕以故弗甚顯然世言

善擇交者人人推周使君紹興丙寅春道袁州問州之士大夫孰可與游皆曰蔡君子亨故相家也築室硤沙河上葺廢圃為園日延邦人過客飲酒賦詩鼓琴彈碁于其中蓋二十年未嘗見過失是何如伯父曰可也立命過蔡君蔡君出迎貌溫而恭論辨而無邪視其家庭蕭然閱其子弟翼翼怡怡爭讀書學文伯父喜曰人言果可信時方求介婦會蔡君亦擇壻一言而兩家通婚姻如東阡北陌也歸道所以然子年尚少竊記之自是

從事四方絕不與子亨相聞隆興改元秋七月歸廬陵
客有斬哀偕謁入者視之子亨之子岳也予驚問來故
則哭曰今年先人棄諸孤雖葬而墓碣未刻猶不葬也
岳為是不敢顧几筵扶服亟來惟執事哀許予辭謝累
月岳泣請益虔子兄又提筆迫曰趨為我具藁乃取左
從政郎吉州司法參軍魏吉甫所狀世閥行事而比次
于下君名衢子亨字也興化軍仙遊人曾祖準贈太師
秦楚國公祖京太師魯國公父僚贈少保謚文簡母永

寧郡夫人強氏幼以門功補承奉郎轉承事郎嘗贈金
紫除太府丞改直秘閣君父母皆早世能自立不為貴
驕氣習在政宣間公私事一無預知故官以例遷未起
拜及舉疾落南有司獨刊去君名則其始末可槩見矣
敵之入大梁也士民挺身避難君能冒死走父母殞官
取柩南奔其後羣從有困窮死亡者君悉為賙給蓋藏
之平生孝友類此死時年五十八正月己酉日也葬以
四月壬申墓在州之西平甲娶洛陽王氏惠獻公化基

之曾孫生四男嶽岳岡岳嶽岳前死四女長壻右文林
郎武安軍節度推官王注次則子兄迪功郎監潭州南
嶽廟必端次進士張伯虎其一既嫁復歸孫男三人垓
圯埴女三人尚幼銘曰家鼎盛或端靖名必振廢而居
誰爾諛乃有譽銘君墓是之取尚無斁

徽猷閣待制宋公暎墓誌銘

乾道二年

公諱暎字景晉姓宋氏其先北州大族後徙開封府祥
符縣至公之曾祖鄭國元憲公庠以道德文章厯踐樞

宰賜第咸寧坊官至司空薨贈太師中書令兼尚書令
曾祖妣魯國太夫人胡氏祖均國朝散郎致仕累贈金
紫光祿大夫祖妣大寧郡夫人陳氏父宙年朝請大夫
致仕累贈銀青光祿大夫妣同安郡夫人張氏安康郡
夫人呂氏公弱冠補太學生嘗升舍會父致仕當補官
公友愛其弟推與之政和四年別以門蔭為將仕郎調
孟州刑掾改河北糴使司幹當公事選充大晟府修製
大樂管幹文字以生母令人崔氏心喪去官服除用前

糴便賞改宣教郎為河北轉運司幹當公事提舉洛口
交裝催促綱運擢尚書司門員外郎出為蔡河撥發宣
和元年冬徽宗召對稱旨命知宿州明年方臘起連陷
郡縣數十羽檄調重兵擊之所過騷然宿為往來要衝
凡軍需獨前期告辦民以不擾久之以治郡最一路除
直秘閣四年夏童貫退師白溝公適入覲帝命乘驛按
之盡得其狀未幾以將作少監召賜緋衣銀魚數條積
弊多所裁革遂長監事賜服金紫六年正月遷殿中少

監入謝帝諭以裁冗濫扼侵漁公悉意奉行一時號為
稱職靖康改元幹離不深入道君將幸南朝廷議守襄
鄧中外洶洶士大夫潛懷向背欽宗雅才公擢徽猷閣
待制添差江淮荆浙等路制置發運使實欲調護道君
行宮也人謂公且辭行公曰此非臣子効力時耶以正
月三日受命而是夕龍德之駕倉皇出通津門公捐家
貲募兵民擊河凌通御舟遂從道君踰淮渡江是月十
五日次京口時敵已破京城道君命所在州止東南通

角又上供綱運毋令敵得又高俅總領禁衛三千留控
淮津惟童貫將勝提兵三千實從會二浙勤王兵三千
人過鎮江道君命留之疊三事而疑似之言寢聞于是
有上書天子乞斬童貫等六人者二十八日詔聶山為
發運使代公密圖之而與公在京差遣山行有日尚書
右丞李綱言于帝曰斥貫等一詔書足矣投鼠不可不
忌器帝曰朕意亦然罷山不遣而公二月未至闕帝召
對首問道君安否公敷奏詳明帝喜曰流俗紛紛朕皆

不信也明日復召至延和殿授使指令奉書行宮公頻
首曰臣脩數从官蒙任使敢辭難乎顧愚賴不能道兩
宮之情死無以塞責帝曰朕自道君在外我食不安彼
小人何知連輒猜間不可不慮卿頃嘗將命至闕坊又
久在禁省吾父子知卿故舊卿一行往矣道此誠意用
釋朕憂公知不可辭即奏云陛下仁孝天下所共知况
臣親聞玉音敢不竭力帝曰朝廷昨命童貫留守京師
貫輒不告而去名為扈從實邀耳議者屢請誅之朕以

其在道君左右弟貶池州卿為我奏遣母令舉朝尚以
為言也公曰謹奉詔乃三月四日再除公發運使填高
衛闕暨明日入辭帝曰更有一事尼堪再犯澤潞朕以
道君未歸屈已懇和須其退師即遣奉迎使詣行宮問
歸期不然遊騎脫復渡河豈不驚運君父公曰聖慮及
此可與天通非羣臣所能及也帝目宦者取書起立授
公公退即疾馳不三日至符離俄報云道君入虹境矣
公率官吏迎拜河上道君召公登善濟舟公進書脩道

上意道君感然曰此因流言致朝廷相形迹監司州縣
觀望風指往往忘分慢職因條舉數十事每及一事即
泣下云云公曰方都城晝閉中外隔絕雖御前號令州
縣或不奉承非獨行宮也守令之罪蓋不容誅朝廷何
預焉道君意乃解公即奏臣出京師時聞童貫貶池州
今猶未行何也道君曰勝提兵隸貫未知所付公以便
宜奏云若付宇文粹中而以范訥為副宜可道君曰善
召二人使交兵明日道君語公童貫得勝提軍情驟罷

之且生變奈何公曰貫平日敗壞軍政西北之人怨入骨髓今斥去乃所以安衆生變之語殆貫自解耳道君趣實行一日道君復語公內禪自出我意雖皇后亦不與知況羣臣皆欲保家族敢與此耶我終出門姦人便欲貪功離間是無天也再及遶角等三事泣然曰我為國家過計耳得毋以此致疑乎公曰臣造朝總數月無日不召見主上誠孝由衷思慕形于言色雖百小人進間言決不能入若廷臣則陛下何恤道君曰帝知我急

歸否公曰主上正以黏罕在澤潞故願陛下少留京口
以待奉迎使與儀物偕來臣固疑迴鑒太遽而未敢啟
也道君曰兩日待說偶未暇只為無累糧住得耳公驚
曰臣雖被召去自有淮浙兩路漕臣及發運使副在揚
潤顧不能應辦耶道君曰有一文字待付卿令左右取
匣中文書來公跪讀之乃尚書省付知宿州林麓劄子
也初州有御前竹石錢十萬緡道君過州時親筆付麓
取其半麓總輸二十之一而以其事上尚書省尚書符

宿州其以錢上京毋擅用後題正月十三日日下獨執政官一人簽書公讀畢奏曰陛下在位凡御札寶批及三省批旨若畫可畫聞有不作奉聖旨付外者否道君曰無之公指堂帖曰此既無聖旨二字又未嘗徧書宰執非朝廷意甚明殆園城中小吏作常程行遣而當筆者不察爾臣非敢游說以寬聖慮也道君視之欣然曰卿言是我未思此公隨事解釋大率類此行官次南京公以帝命請先入奏道君乃以書授公且賜手詔一通

大畧謂嗣聖遣宋某齋書至遂得通父子之情詰言委曲坦然明白由是兩宮無纖毫憂疑至以公比張仲孝友公再拜跪受訖夜以小舟馳去比至虹橋宣召者踵來公奔至崇政殿門謁者云上留宰執待君已有旨免朝見止常起居可也公及階帝已起立連問道君遽歸意公不敢隱累糧語繼以堂帖進呈且具道所以解釋道君者帝悅曰卿應對甚善當議褒賞公曰臣將命無功免責為幸賞非敢冀也還部未幾臣僚劾公奏宿州

事為脅持離間而大臣獨書劄子者從中助之詔落職
與在外官祠言者不已七月再貶單州團練副使永州
安置紹興元年復朝請大夫次年始得提舉亳州明道
宮凡厯八任改提舉江州太平興國宮積官右朝議大
夫二十七年光堯壽聖太上皇帝眷懷舊事命取徽宗
所賜手詔以入親為製題記數百言宣示百僚襲藏數
文閣又下詔暴公之忠還其舊職歲賜藥石眷待甚厚
惜公已老無意於仕矣後四年遂納祿轉右中奉大夫

是歲六月二十日終于正寢實紹興三十一年享年七十有六訃聞贈右通奉大夫贈黃金百兩錄其孫三人制詞有學知守其家材實裕于用被遇徽廟竭識靖康謨訓具存忠勤可驗之語然則公蘊蓄雖不盡施于世亦可無憾矣公事親孝接物誠出於天性非勉強而然幼篤志問學稍長多識名士其聞見議論皆有根柢晚築室章江上益以文史翰墨自娛故士大夫樂從之游坐客常滿公待之無戚踈夷險一與竭盡雖遇橫逆不

校也先娶李氏再娶張氏皆追封令人二男子奇右從事郎早卒仲甫孝謹儒雅今右承務郎充江南西路提舉常平茶鹽司幹辦公事二女適進士呂溥之右從事郎李耆碩孫男三人文饒文翁文成女適右修職郎劉泌鄉貢進士魏好信餘尚幼曾孫曾老巖老女一人仲甫以是年九月二十七日葬公于洪州新建縣柳花鄉西山麓珠陵陂岡之原使來求銘惟我先夫人宋之自出某為兒童已識公每聞其道靖康間事皆可書而誦

也其後入史院為編修官以諸家所上太史書參考公言無不合者故于論次特詳焉夫其大節詳矣他固不嫌于畧也銘曰泰寧之世士趨寵榮一臨時艱則謀其身其身是謀國于何恤君臣父子秦越肥瘠有美宋公相門之英騫翔禁密曰惟才臣平居涖官稱職而已逢辰之虞惟上楚使靖康岌岌外猗內訌不愛其躬調護彌縫我惟忠臣爾覆醜正衆言淆亂盍折諸聖聖有一言萬世不疑巍巍三朝先後同辭祐陵紀之欽廟倚之

明明紹興又增美之孰不忠孝孰晦而顯天亦耆之式
燕爾晚保有令名言歸茲藏載紀邈綿母或懷傷

子柔弟墓誌銘

乾道二年

亡弟子柔仁而剛敬而和敏而篤學幼事母孝長從兄
順與人交忠信廉遜其存心主于厚而自期甚遠其容
貌美秀惇實善觀人者與談五行者負風鑑者皆曰是
必貴且壽然年止三十三再與計偕而已嗚呼非君不
幸予之不幸門戶之不幸也初紹興庚辰春予官學省

君以七月自吳門來道得小疾相見時輒為訣語八月
寢劇十一日神識湛然而逝後六年當乾道丙戌十二
月二十八日子自上饒改葬先夫人于吉州廬陵縣膏
澤鄉長岡之麓乃祔君柩于兆域後五十步成君志也
周氏世鄭人徙吉三世矣曾祖中奉大夫諱某祖左大
中大夫諱某考左朝請郎太學博士諱某先夫人姓王
氏君既沒衆遺草得文三卷語皆驚人使少假之年必
將追騷人而與遊望聖門而力造肯訖是耶君名必強

子柔字也娶濟南韓氏無子予既求宗姓繼續其祀又
哭之以辭曰嗚呼子柔今安之乎英氣凜然戢于斯乎
唯顏回短命兮聖不幸而嗟洛如鄧攸乃無子兮信天
道之難知彼一而君二兮雖塗之人猶涕洟況手足之
痛兮慘猶甚于屠割已而已而九原不可作兮誰知我
悲

文士慶墓誌銘

乾道三年

文生安國將葬其父士慶泣而請曰安國不天遭罹大

艱今歸窆有期敢乞銘于執事其幸賜之昔我世父辰陽公卜兆廬陵族葬諸喪之在江南者生首挾錦囊之術來相大事其宣力甚至義不可以弗從也乃以士慶之行詢于閭里皆曰其持身愿其濟人勇聞世有浮圖法者謂齋戒所以為善施予所以植福於是終身行之既得疾預知亡日告違于常所來往屬續不亂已而赴弔者咸重惜其死噫亦可以為此鄉之善人矣士慶字善積世居吉州廬陵縣之永知鎮享年六十有四娶劉

氏生二男一女惟安國存焉其終以紹興壬申十月癸亥而以是歲十一月丁酉葬于鎮東金鳳山陽田之原銘曰生有以養死有以葬壽不至于夭而祀不至于曠又何快乎

靖州太守吳君順之墓誌銘

乾道四年

公諱順之字伯思其先建安人曾祖太常丞方天聖中公與兄正肅公育及京俱以文章稱同年登進士第歐陽文忠公所謂吳氏兄弟名聞天下者也正肅以才猷議

論被遇仁宗入參大政出殿藩輔而弟正憲公充又以
嘉謀直道相裕陵遂為宋大家惟奉常位不滿德累贈
金紫光祿大夫正肅既從其皇考葬鄭州正憲亦葬開
封于是建安之吳多占籍北方而公為雒陽人也曾祖
母隴西郡夫人李氏祖安行左朝議大夫祖母恭人陳
氏父似耀州三原縣丞累贈右銀青光祿大夫母武陵
郡夫人程氏公初以祖蔭補太廟齋郎政和三年為將
仕郎鳳州河池縣尉歷監楚州在城清酒務用舉者陞

從政郎宿州刑曹掾吏誤入民死罪公讞正之改宣議
郎知醴州武功縣未赴徙宿州司士曹事欽宗登極轉
宣教郎賜服朱銀靖康初添差徽猷閣待制宗煥為江
淮發運使辟公幹辦公事俄省員罷遷通直郎建炎覃
恩轉奉議郎選知福州侯官縣中原方拏兵盜亦起劍
建間軍需急甚公應辦如無事時轉運判官魯詹等列
薦于朝進承議郎以寵之州歲賦荔枝擾民又公帑取
物無藝公曰邑困矣願少裁其數守帥不樂公遽請祠


得主管江州太平觀紹興詔書求人材前宰相李公綱
汪公伯彥皆薦公擢知海州改連州奸賄鄧禮聚衆剽
湖廣久之就降號義丁禮仍統之常禁以肆官吏無敢
寃切公取尤暴戾者磔于市餘帖帖畏服連故多坑冶
旁郡上供銀率取給焉歲久負繁民破產莫能充公力
請蠲其半免符下吏抃躍繪像以祠秩滿主管台州崇
寧觀尋知汀州境素多盜戍兵驕不可倚公擇勤卒千
餘晝夜閱習未幾皆可用盜以不作郊恩賜三品服于

是自承議郎積功次五遷至右朝散大夫去為郿武軍
遂以右朝請大夫再知汀州未上復主管崇道觀起知
復州移靖州州本夷境一語不酌輒白及相向謂之仇
殺甚則合黨羣起謂之結門款異時守皆武臣文法濶
畧公初以文臣臨之下車語僚屬曰蠻夷荒忽不威制
則玩不靜治則擾乃大修城池集禁卒教以挽強徐召
其酋長戒曰安爾巢穴毋犯省地犯且誅爾亦命守城
寨吏彼不生亂毋擾彼矣先是數十里間有崖頭蠻數

相仇殺畏公威不敢動羈縻州有相率請輸丁未如近
地猛人且歲時貢獻于朝者或謂是可通蜀道宜納之
笑曰守邊莫如安靜吾老矣豈紛紜以求進哉期年公
知疆場既寧則增闢學舍以道藝進諸生即城東葺社
稷壇凡可以化其民者未嘗鄙夷之風俗浸熾矣代還
卜居筠州隆興元年八月甲戌以疾卒享年七十有六
是歲十月乙酉葬于隆興府新建縣江崖鄉招賢村之
原公生名家通經力學早自植立性極孝友朝議公疾

躬治藥餌不斯須去左右逮其卒欲以適孫解官行服
仲父禮却之公曰祖喪從厚不亦可乎自言河南府竟
如劉輝故事後當任子推以與姪若姪孫平居待人一
以寬恕及在官遇事則果敢能斷省訟牒決疑獄吏服
其精敏然聲色未嘗厲也持已尤廉潔公家財無絲髮
妄用善鈎校隱欺故所至不加賦而用足厯守數郡雖
無赫赫名去必見思在仕途久年除次補不務速化一
其初終有譽無瑕可謂難也已初配宜人陳氏翰林院

學士繹之孫前五十七年卒再娶宜人雷氏國初名臣
德驤之後前十年卒至是合葬招賢二子藹右文林郎
蔚右從事郎皆好學有吏能一女適右從政郎梁敞孫
男二人千乘千秋俱將仕郎女二人長適右廸功郎朱
時中次未行昔我亡姑實歸文林君故來請銘乃為銘
曰猗與吳公園外而方中強其志而巽其容人徑而逢
已緩而從不阨于窮不極于通以卒其功以壽其躬猗
與吳公可謂有終



文忠集卷三十一

欽定四庫全書

集部

文忠集卷三十三

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣于希賢

欽定四庫全書

文忠集卷三十二 省齋文稿三十二

宋 周必大 撰

墓誌銘

文林郎劉君令猷墓誌銘 乾道六年秋

紹興辛未春廬陵郡貢士對策集英者四人予與辰告
劉君齒齊而志合相好也既唱第予注徽榷君亦得尉
外邑將同寮焉未幾予易中都官而君丁外艱或離或

合率數歲一見隆興改元予自左掖奉祠歸君方築室
治園圃教侍女吹竹彈絲以娛太夫人予數過之相得
益歡乾道三年君去佐武陵幕予計日需其歸五年冬
乃聞君遭母喪纔浹旬以毀卒予哭之慟明年春諸孤
持道州永明縣主簿彭恪狀來請銘予方以使閩奏事
未暇作也秋八月書來告曰塋期迫矣幸賜之銘噫尚
忍銘吾亡友也夫君諱令猷辰告字也其先自金陵徙
家吉之太和縣曾祖紹不仕祖及甫贈右宣教郎考諱

解左承議郎通判德慶府號通明吏其卒也侍讀胡先生為誌其墓母歐陽氏君少穎悟年十四別駕令東流君一試池校輒魁諸生自是益刻意問學文采日新初別駕年二十五由鄉舉登科君亦如之歸拜二親里閭嘉嘆調婺源尉不克赴主贛州興國簿吏以例齎銀若干來迓君曰例可承耶却之或曰如他人何君悟曰簿廨寓僧坊三十年盍拆賣為土木費乎役遂以成後人賴之邑令同里劉公子昂健決能治劇得君大喜相與

通譜系君悉心佐之政遂為一路最秩滿循左文林郎
調常德府觀察推官一府資賴他郡有疑事部使者必
付君平決無不中理諸公交薦之湖北控川峽岷洞庭
連辰沅號險阻荒絕沿檄者率規免惟君未嘗辭奔走
殆無寧歲竟以此病然猶自力恐貽親憂會太夫人卒
君病遂劇以十一月十八日亦卒享年四十四歸葬於
廬陵縣連山桐木岡元配易氏祔實六年十月二十六
日也君再娶曹氏慈聖光獻皇后曾姪孫女易夫人生

五男召孫于孫宜孫耆孫吉孫皆力學有父風孫男女
各二人君天資孝友心計精密別駕平生樂施喜客家
無餘資君未冠幹蠱已有聞盡貿婦財易良田約用而
豐施以養父之志父沒庶弟諸妹婚姻無失時者經紀
娉媾家使其幼穉有立常產不隳人皆義之姻黨有獄
吏卒方圍捕親屬駭散君奮身當其門衆帖帖無敢暴
家貲以全其急病好義大率類此嘗考試宜春江陵解
進士郭昌明彭大年商剛中高岑明年皆擢第兩邦稱

為知人嗚呼君有絕人之才宜為世用而賦命止此予
既悲而憐之且自愧昔者不能推賢揚善負朋友之責
也故追叙情好而系之以銘曰

嗟惟君 才且良 富術業 耀辭章

如用我 何不臧 劍發硎 折其剛

彼蒼天 命靡常 尚無憾 嗣方昌

左朝請大夫魯公謚墓誌銘

乾道七年

近世有儒學起家銳意功名之士曰魯公如晦官雖不

大顯於時而姓名籍籍班列中始予自金陵入朝以婦家有連相好也會完顏亮將渝盟公日詣丞相府論天下事纚纚不止諸公雖知其才而不能用常以是惜之其後予歸廬陵絕不相聞者累年會公弟李欽奉使江西予問如晦今何如李欽曰吾兄宦遊不遂退居里中無意世事矣暨予還朝則聞公屬疾未幾李欽遂以其訃來且狀家閥行事使之銘義不可辭公諱譽如晦字也其先秀州嘉興人徙海鹽之武原曾祖延厚祖惟辨

隱居不仕父壽寧任右奉議郎贈右通奉大夫生六子力教以學長詹登第崇寧間終樞密院檢詳諸房文字公少尤刻苦紹興五年與季欽同登進士第自是魯氏子弟競勸舉於鄉者歲增多公初調建康府溧水縣主簿帥葉公夢得材之命行江寧縣事百里以治葉公儒先吏師與公論文計事率至夜分其親厚如此俄丁外艱服除為淮西江東總領所幹辦公事分司池陽邊烽初息軍費冗濫公檢柅其姦歲省不貲魏公良臣出守

一見歡若平生遂通婚姻用薦者陞左從政郎徙淮西
茶鹽司幹辦公事兩漕惟置漕臣刑獄常平茶鹽事悉
隸焉諸司有疑事輒屬公區處無不中理舒州五邑爭
承久不決公為決之改左宣教郎充通州州學教授主
管台州崇道觀起為淮西安撫司主管機宜文字帥劉
剛鳩民兵十餘萬將校數百聲振北方公贊助為多剛
卒衆將亂公訓曉撫循一軍帖帖敵焚榷場邊民洎懼
公鎮之以靜人為安堵入主管官誥院完顏亮既斃太

上視師江潯詔公從行兼領進奏院文書填委整暇若平時上即位遷大理丞治獄明恕為時所稱公三仕於淮雅知南北形勢兵將勇怯至是輪對為上極言之且請擇大將以重兵屯形勝地無事則力不分有事以逸待勞此上策也上深以為然兼戶部右曹郎官民有詣御史府訴婚田者輒請付公皆得其情上方樂聞忠言詔侍從臺諫各率其屬條具弊事公言風俗未正紀綱未立賞罰未當語甚切至頃之請治郡得池州隆興二

年虜再窺邊趨公赴鎮淮人日夜南渡公竭力招集至者如歸軍士有得信箭刻謀書云云者公笑曰此姦人欲搖衆爾不為動闔境晏然先是諸郡調丁壯防江擾甚敵師退公以便宜散遣朝廷咨美仍詔他郡如之清溪出城南水潦泛溢人病於涉唐會昌中刺史李景業始築大堤於南續長橋於北揭名通遠往來便之歲久浸壞公命增築新堤自城屬齊山延袤數里翼以嘉木醴水為三道橋跨其上別揭新名迄今以為利乾道元

年江浙大饑上焦勞甚遣使旁午會九華綿山竹生實
饑民就食日數千公思有以寬上心具以聞而言者指
為導諛非本意也坐罷郡士民懷公惠政爭挽留不置
尋復主管崇道觀起知真州已而嘆曰吾志大而命不
副歸與以佚吾老初公築通隱詩人何卿麒洪翰林邁
王端尹十朋王司寇柅皆賦五言以美之至是改曰遂
隱自為之賦客至輒歌呼飲酒間以琴奕酣適竟日素
喜釋氏書晚自謂有所悟哀樂得喪泊如也七年十一

月六日以疾卒於正寢享年七十有六積官左朝請大夫致仕娶陸氏封宜人前卒四子可簡左承議郎通判舒州可適右迪功郎嚴州司戶叅軍贈右承奉郎皆力學工辭章前卒可輔亦早世可復右迪功郎廣德軍廣德縣主簿濟美垂裕庶其在此二女適左奉議郎樞密院編修官孫雄飛右儒林郎監行在點檢贍軍激賞酒庫所糴場魏仲恭孫男九人珏珣羽茲所開弼翼輩女二人適右承奉郎周準右迪功郎蔡興文曾孫男三人

之茂之柔之純女四人明年三月壬申葬於湖州歸安縣至孝鄉仙嶺與宜人同兆公性樂易事父母友兄弟根於誠處朋友姻戚間皆得其歡心家範整整子孫率勸飭雍睦尤喜周恤親族鄉黨義之天性嗜書少老如一所論著要以名家者為師法有文集三十卷漢紀考異十一卷集皇朝要覽一百卷又嘗進江淮表裏圖上邊防十二事蓋將考古驗今自見於功名惜乎弗遂也哀而系之以銘曰

人患無志不患無位人患不久生功不患不成嗟
吾如晦由郎而守仕非不偶踰七望八年就非壽
然而志鬱於初功弗究其圖已乎已乎其亦命矣
夫

鄉貢進士歐陽耿仲弇墓誌銘

乾道九年

歐陽氏族望廬陵而家於永和鎮者尤以儒稱吾友耿
仲又永和之卓然者也憶予遊場屋時耿仲已嘗舉於
鄉其仲奕叔弇季彛號里中四傑雋敏辨博衆屬目焉

他日過其居翼翼怡怡有古人風予每語人是家且興
其後仲相繼早世耿仲復屢抑於南宮遂卧末疾乾道
九年二月壬辰竟不起嗚呼予識君兄弟纔二紀襲來
而弔者三今惟季也巋然當門戶命之難堪如此寧不
歎以悲乎予扶卜以四月癸酉祔耿仲於鎮東金鳳山
祖墓之次銘予責也故不辭耿仲諱弇朝散郎通判澶
州槃之曾孫隱君子璟之孫貢士襄之子少穎悟善屬
文袖書謁御史田公如鰲許以遠器甫冠與計偕益嗜

學不倦後進爭從之往往法其言行有所植立不專為
科舉計也享年五十三平生喜著述類成五十卷號鳳
山集娶陳氏實生扶能世其業三女適進士曾顯祖吳
從義一未行二孫次蘓季蘓女一人銘曰

德焉無瑕學焉無邪亦既振厥華謂將昌其家而止
於斯吁其奈何

清遠縣令鄧君洵侯墓誌銘

乾道九年

乾道八年冬清遠縣令鄧君卒葬有日敷文閣直學士

胡公大書官族蓋其墓孤溥復來謁銘予謂得胡公書
不朽矣奚以銘為溥請益堅乃為紀初終於下君諱洵
侯字元直世為吉州廬陵縣人曾祖河祖注父衍皆業
儒母曾氏生四子而君為季年十五由縣庠升泮宮試
藝日有聞預宣和上舍貢靖康改元同其兄洵美邦彥
涇舟與計偕而涇舟遂中第里人稱焉君既篤學且練
習世故樂善喜為人師監司守令爭延教子弟家永和
鎮有宅一區附郭田二頃伏臘賓祭有以自足筆耕文

績力也然每上春官輒不利嘗再對策集英殿下再納
勅牒而歸今天子即位特補將仕郎而君病矣吳興芮
公暉賢者也漕嶺表辟君廣州清遠縣令瓊帥復召君
為屬皆不果行卒年七十六易箒猶題詩示子孫初君
以十月十九日昧明生其死也日月時適同衆頗異之
娶鄉人歐陽元老女有懿行年六十九前君五年卒葬
青石之長岡一男溥也孝而勤於學四女嫁進士丘大
章曾尚文餘天孫男三人良臣忠臣正臣女三人葬用

九年十二月辛酉其地在縣之膏澤鄉灘頭平相嶺君
所自卜也銘曰

試言於廷

不潰於成

覃慶天飛

疾窒其亨

何志之闕

而命之屯

尚崇其墳

燾後之人

外祖奉議郎王公覺墓誌銘

淳熙二年

公姓王氏其先永寧軍博野人世業儒曾祖亮中天聖
進士第以能守邊易武階至洛苑使贈右武衛將軍祖

察少辭任子恩不就韓忠獻王宣撫陝西薦其才而官
之終太子左清道率府副率贈屯衛將軍改中散大夫
葬相州之安陽子孫遂為安陽人中散長子諱復屢典
名郡終供備庫使封永水縣男贈少師次諱後終朝奉
郎贈朝散大夫娶杜氏實生公公字天民宣和五年以
父任為將仕郎紹興初補迪功郎昭州司理叅軍以親
老不赴六年主洪州南昌簿秩滿丐監西京中嶽廟以
便侍養陞右從政郎調福州閩清令聰斷精審吏無敢

欺洪水暴至公禱南山水即退闔境神之去為豐城縣
縣當川陸要衝素號難治令鮮終更者公至則大治會
齊述嬰贛城叛王師出征公未嘗秋毫賦民而過者畢
給部使者行邑其徒隸以供張去吏請責償守驛者公
獨具名物檄取之郡卒持符至怒餉謝不如欲猝吏喧
庭下公杖而繫之積二事臺府外稱其正而心弗善也
又往往為公懼公曰不過不吾薦耳焉能害我終亦無
他徙吉州太和令太和尤號難治又乘舊政廢弛公刻

除蠹束縛奸宄聲譽赫然盜自他邑來尉不能拒吏民
驚避公自率衆擒之纔數月丁內艱而去時二十五年
也服除調衡州安仁令三十一年論太和功改右宣義
郎知江州瑞昌縣轉右宣教郎仆姦植良人服其能轉
右通直郎賜緋衣銀魚乾道七年通判柳州轉右奉議
郎九年主管台州崇道觀淳熙二年六月卒於正寢享
年六十有七取宗室女先公二十二年卒贈孺人四男
簡籌錢篆三女俱未行孫男二人泚澄女二人公天資

明敏尤長於吏事使遇盤根錯節據發游必將振耀
一世取富貴如拾地芥而淹屈州縣汨汨以老其命也
夫初公葬太宜人於撫州臨川縣靈臺鄉烏龜源遂家
臨川遺命卜葬於塋側諸子乃以是歲八月二十四日
襄事使來取銘公於先夫人為從叔凱風寒泉之思其
何忍辭銘曰

惟吏之能 以公售私 用力雖勞

人孰汝宜 公才敏明 而守堅正

寧身之誅

不撓其政

周旋五邑

民允懷之

纔佐一州

奄其殆而

天賦其能

不畀以命

嗚呼奈何

尚篤餘慶

承務郎胡君泳墓誌銘

淳熙三年

君諱泳字季永吉州廬陵人曾祖愷妣張氏以百歲封孺人祖載贈朝議大夫妣碩人陳氏張氏父澹菴先生銓以勁節危言為國司直雖小夫賤隸椎髻草服無不

知其姓名今為龍圖閣學士妣碩人劉氏紹興八年先生自樞篆黜佐福州幕道由姑蘓而君生故小字蘓郎六歲隨先生謫新州已能背誦春秋詩人陳元忠試之如流目為春秋生先生再貶朱崖渡海道瓊故叅知政事李公光在焉見君穎悟許妻以孫自瓊過儋耳拜蘓文忠遺像於動鏡閣喟然興歎年方一星終人皆異之既抵朱崖先生聚徒授業諸生人執一經求訓解君甫弱冠往往與討論二十六年秦丞相死先生與李公皆

內徙初秦氏揭二公及趙丞相姓名於格天閣趙丞相
前薨至是先生賦詩有閣下大書三姓在海南惟見兩
翁還之句君口不絕吟先生曰孺子可教因授以句法
三十一年春侍先生歸廬陵講道家塾兄弟怡怡如也
今上登極先生自吏部郎不逾時以左史入詞掖遂為
兵部侍郎君曰從中朝名士遊聞見浸博隆興初郊奏
補右承務郎家居累年或勉以仕則曰吾斯之未能信
乾道七年先生固命君類試中之虞丞相邀與相見畧

不干以私調監淮西江東總領所太平惠民局兼監行
宮雜買場先是先生得旨進所解易春秋及二禮君曰
夜編次讐校先生賴之淳熙元年春君當之官而不忍
去親先生曰吾固欲泛大江游金陵其亟具舟吾與爾
俱君乃迎侍以行留守劉公珙以二府重望少許可獨
禮君厚薦之公車二年秋得寒疾逾月病益侵呻吟皆
詩間作樂府詞旨超詣十一月庚午竟不起得年纔三
十八配即李氏其父孟監終淮東提舉茶鹽生三子櫬

渠程又有遺腹君人物爽邁天資孝友幼居母喪如禮
事所生母袁氏盡敬學有家法嘗讀橫渠易至心化在
熟擊節歎曰至言也請終身誦之雅好吟咏慕陳后山
而學焉某蒙先生不鄙間許唱酬君輒用韻見貽語皆
驚人蓋天才有過人者充其素蘊必將發聞於世一病
而逝可哀也已弟澥瀟及其孤奉先生之命卜以三
年夏四月壬辰葬君吉水縣中鵠鄉白蓮塘之原使以
妹婿葉昌嗣之狀來請銘某按禮記延陵季子適齊而

長子死葬於羸博之間既葬而封既封三號遂行孔子
曰李子吳之習禮者也蓋言其在吳為習禮耳既而曰
季之於禮其合矣乎是又疑之詞也周禮以長子為門
子謂將代父當門者也其事重矣昔就其養於所居之
官今返其柩於父母之邦若先生者可謂知禮矣銘曰

木生荆山

既厚其培

雨露濡之

庶幾條枚

飄風振林

秀者先折

天乎奈何

尚茂來葉

朝散大夫直顯謨閣黃公石墓誌銘

淳熙四年

公諱石字圯老姓黃氏世為温州平陽人曾祖邃祖曷
父理有聲太學贈官至朝奉郎母陳氏贈宜人公幼篤
學及長識慮精審喜論國家大利害紹興七年投匭上
書言內事可治者七外事可治者四天子異之下其書
給舍皆謂切時可行詔永免文解加賜束帛明年遂中
進士第補左迪功郎融州觀察判官未赴改福州州學
教授學規素弛公命正錄而下各舉其職諸生或不告

輒出公曰此職事不職也盡罷之聞李葵李楠林之奇
為衆推服即走其家備禮延致學田故為吏乾沒供饋
日賸公大加括責歲輸數倍於是增置弟子員優給職
事以俸而督其藝業帥左丞葉公夢得賢之薦於朝葉
公尋奉祠闔郡郊餞獨顧公曰子且顯其自愛袖出前
執政薦章畀公其見器如此秩滿以書抵秦丞相曰上
踐祚十九年儲貳未立安危所係孰大於此公獨不開
陳乎不報得西外敦宗院宗學教授視事踰時丁內艱

二十二年免喪秦丞相尚當國公申論前事秦曰君謂
某向不省耶面舉百餘言而以時未可為解復得南外
宗學教授丁父憂不赴服闋沈丞相秉政公以語秦首
語沈沈亦不能用授建康府府學教授而去二十九年
留守張忠定公召赴闕公送以書大畧言內則國本未
定閭寺寢昵外則北人懷貳大將乏人國用不給張公
咨美既入對言儲貳尤力適契上意未幾遂行典禮三
十一年冬完顏亮死議者爭欲乘機進取會太上皇帝

視師金陵公獨陳八事謂宜按甲休兵徐俟敵隙其後諸將果然無功駕還臨安公以銓格改宣教郎選充諸王宮大小學教授主上登極轉奉議郎賜服緋銀乾道元年九月輪對論二事其一曰舜大治而禹益儆戒無虞成王守成而周公作無逸真宗東封還孫藉上書勸無自滿假召賜出身今南北始和願陛下以舜禹成王真宗為心益自戒懼無或暇逸上獎諭云卿言真致治之本其二曰儲君學問當求堯舜禹湯文武之用心不

當如書生分晰章句締繪文詞時莊文太子留意於詩
公故及之上大喜曰朕固嘗以此諭太子卿言正與朕
合退朝以章送東宮旦批付中書黃某與陞擢差遣今
晚便可擬來遂除校書郎入館不試蓋異恩也十一月
進著作佐郎二年省試初擬公黥檢試卷上特陞叅詳
官三月再對力陳正心出治之要上曰卿言不諂旦夕
別有委用四月兼權司封郎官十月為真仍兼司勳十
一月太上聖政書成以公經修進秩一等四年夏三輪

對力言陛下為治雖勤而未得其要且用人當辨才與德其語益剴切十月除樞密院檢詳諸房文字卷十一月改右司員外郎廷尉讞囚有父被毆不死而其子托以復仇殺毆者二人朝議貸死公言父未嘗死而置投人之罪他日頑民與人有仇導父使鬪從而殺之將不可禁如死者何詔是公議五年八月進左司時公與左相善右相不樂也會蜀人蘓森乞用元祐黨籍恩補官右相欲與之公言紹興六年雖許補官尋以偽冒故八

月纔令免解既克前勅矣右相滋不悅公遂引去除直
顯謨閣江東轉運副使六年行部值諸郡大水壞太平
圩田公以其事申三省而重於再出擾人委官相視賑
濟且奏其施設之序三省得初報即取旨差公躬親按
視命方下而委官之奏適至左相已去右相劾公弛慢
不親行兩官罷或勸之辨公曰吾失職獲譴尚何辨聞
者譴之六年冬主管台州崇道觀繼復原官九年八月
再任崇道觀淳熙二年十二月六日以病卒享年六十

六積官朝散大夫妻宜人王氏某人之女男裳迪功郎
新衢州常山尉三女長適林俱次適迪功郎湖州武康
縣主簿毛憲季適迪功郎新臨安府司戶叅軍林達已
孫男女各一人其子卜以四年十一月壬申葬公某鄉
里貸山之原使來請銘某昔與公分教金陵雅相善故
知公為詳銘曰

金華唐與政名士也知人而善評嘗謂杞老容粹而
溫心和而平稠人廣坐如不出諸口間發一言則辭

盡而理明蓋靜而能謀柔而不傾學耻虛文而實用
之為貴論不阿世而君民之為心若此者可以為天
子之近臣矣嗚呼是為銘

文忠集卷三十二

欽定四庫全書

文忠集卷三十三 省齋文稿三十三

宋 周必大 撰

墓誌銘

靖州太守李君發墓誌銘

淳熙五年

公諱發字秀實吉州吉水縣人曾祖宗應祖復父汝明
贈朝散大夫母宜人彭氏初五世祖葬縣之赤石潭卜
云子孫百年當有為二千石者大夫一日夢至潭上見

巨鯉躍出驚波洶湧震動磯石旁有偉衣冠人笑曰發
矣發矣未幾生公因以為名大夫既力學不遇刻意教
三子長卓季植公其仲也幼警悟能文十四入郡庠遂
貢京師兵興徒步還家已而重臣分鎮諸道客從者取
祿仕如拾芥公游襄漢夔峽間數以奇策撼將帥獨落
落無所合乃復事科舉年未四十用太學連舉恩特赴
集英試補右迪功郎鼎州司理叅軍時紹興五年也公
素號通明加以精審比三年囚無瘐死部使者言狀特

循修職郎去攝邑黃陂調永州零陵令民稅久不均田
在左鄉率籍於右又皆寄產旁邑謂之僑戶豪民猾吏
相表裏賦役病焉令佐課常殿公始至命設兩廡下人
未喻公意明日召稅戶若有所訓曉者既畢集則分實
諸幕使人人自列產幾何稅安在不實聽相糾將根株
逋負痛繩以法實則貫汝又圍羣胥於獄命吐其實而
參考焉民與吏窘皇失措懼不相應無敢隱者即日正
田三萬五千餘畝爭訟既絕歲入大增課為一道最秩

滿陞右從政郎移郴州永興令境接溪洞民強梗難治
公恩威並施罔不畏服諸司以京秩薦者章二十上改
右宣教郎知贛州興國縣丁太夫人憂免喪通判橫州
攝守于賓二十六年詔監司守臣條具便民事公奏交
廣俗誘民男女易翠羽蠻中初猶一夫直十二羽今僅
得其半歲掠賣數百人多烹以祭鬼乞重其禁太上皇
帝惻然從之尋命焚翠羽於行都自是鬻人者息矣轉
通直郎二十八年改知貴州以疾求主管台州崇道觀

轉奏議郎明年為奉使金國書狀官進秩一等三十年
擢知沅州轉朝奉郎今上登極靖州轉朝散郎沅靖介
獠夷控馭稍不至鳴張蛇結為害一方公撫以誠信興
崇學校使荒遠悍戾之習浸淫教化咸帖帖無事既合
符吏上公履歷於銓部誤書年甲考功以聞有詔貶秩
遂致其仕公怡然不以介意日與親舊樂飲絲竹歌呼
窮晝夜不倦如是者累年年八十有一強健若五六十
人與其兄黃髮相對怡怡如也季早世則教育遺孤使

有立鄉人服其友愛淳熙改元燈夕會客如平時已而
微感疾癸丑遂卒三年十月丁酉葬於本縣仁壽鄉南
岡之原初娶潘氏鄂州太守唐之女再娶張氏戶部侍
郎運之媚皆贈安人又娶莫氏亦先公卒六子千里千
秋千頃千得千言俱夭第三千乘今為迪功郎新筠州
司法叅軍能世其家一女適右朝奉郎知邕州葛永慶
再適奉議郎前知南安軍南康縣彭邦光有孫曰蟠女
二人初公與今龍圖閣學士澹菴胡公同肄業鄉校其

休致也胡公入佐冬官適奉詔薦士即上疏曰李某文
采議論皆過人尤長於吏事三為邑五典郡然皆遐方
僻地未究其才上官數交薦今雖老尚可治劇未報有
諫官者乃以是咎胡公胡公坐去國猶念公不置移書
責當路云諸公皇皇市駿骨而使老驥伏櫪耶嗚呼士
大夫視時向背不肯犯嚴出薦口間胡公勇為義篤於
舊而不以進退二其心寧不愧哉他日乘以其從兄靖
州教授誦之狀遠來求銘予謂胡公知公如此乃近舍

皇甫何也乘曰得胡公銘我先人之名固可不腐將如胡公之德不著何屬之子則併著矣某曰然為之銘曰謂公弗遇耶則仕盈萬石矣謂公弗壽耶則年開九秩矣而縉紳鄉閭猶未免乎哀窮悼屈者以祿雖豐未究其用齒雖宿猶裕於力也雖然自古才能之士固有阨窮不沾一命短折冠於六極者矣公何戚哉公何戚哉

靖州推官張君廷傑墓誌銘

淳熙五年

公諱廷傑字漢卿姓張氏吳郡人曾祖政祖奭父憲錢
唐尉母余氏累世同居鄉里義之漢卿少業儒未冠而
孤事叔父烏程尉士能任其家政勤勞弗懈歲時親賓
會集漢卿必冠帶侍側翼翼如也烏程既沒漢卿薄貲
產均畀其子姪無毫髮私人皆咨美起家迪功郎靖州
軍事推官非所好也卜居城中之花橋用所以事烏程
者齊其家內外整整羣從多饒於財漢卿獨意教子藏
書數千卷士大夫喜從之游漢卿亦好客不倦也州西

三十里有華山山腹有大池圖經云常產千葉白蓮漢
卿驚得之日課僮僕刈剔巖竇疏導泉流創亭榭十餘
區環以佳花美木四時皆有奇觀戶部尚書孫公覲為
之記遂為吳門絕景漢卿既葬其婦山中又自為塚舍
日往遊焉生事皆置不問人多笑其迂然漢卿心自有
餘雖不作潤屋計而伏臘猶給無求於人既老預治棺
槨衣衾曰吾宗鮮登中壽我則過之瞑目無憾矣淳熙
三年五月疾革精爽不亂惟以和順力學勉子孫甲子

遂卒享年六十有六娶李氏左朝請大夫通判廣德軍
寬之女先十七年卒五子長聖任早預鄉薦繼入太學
為學諭次聖清皆前死今曰謙曰頤曰復謙亦太學生
謹愿有父風五女長適承議郎簽書南康軍判官廳公
事蔡瑤次適文林郎新知揚州江都縣李安上早世次
適朝請郎新知南恩州楊挺二尚幼孫男五人鎬錡銓
鏞鏜女三人謙等以明年十二月壬午葬公華山實與
李夫人同穴蓋吳縣長洲鄉也昔外舅浙東提點刑獄

王公葆光娶公娣兩家情好久而益洽予以是與漢卿
往來三十年乾道壬辰予自小宗伯奉祠過平江徧游
城西諸山漢卿時載酒邀予自靈巖入天平遂登華山
訪古道舊為笑樂最後置餞虛邱酒闌悵然曰某老矣
再見恐無期他日尚誌吾墓予曰公尚強健何遽及此
後三年予還朝復與漢卿通問無虛月又一年而漢卿
卒其子以監察御史潘公緯所書行實來求銘予其忍
辭銘曰

人生斯世

孰能無求

晉楚之富

金張之侯

無以收之

無樂也憂

表表張公

不膠不流

治生求官

與俗沉浮

他人營營

已常休休

有琴有書

賓燕綢繆

有子有孫

弦誦優游

生無欣戚

死何怨尤

華山之原

樂哉斯邱

勒銘紀之

名與山留

秘閣修撰湖南轉運使蕭公之敏墓誌銘

淳熙五年

公諱之敏字敏中系出梁蕭氏五世祖自豫章徙居江州之湖口曾祖昇妣譚氏祖仲山妣徐氏考固業儒而不求仕惟孜孜教子後贈朝奉郎母安人彭氏少好學有濟時之志李成剽九江係累齊民如貫魚公亦被掠以書生獨免繫會夜賊醉寐公密拔其刀斷民縛縱遣然後遁去時猶未冠人皆竒之登紹興十二年進士第補左迪功郎蘄州廣濟縣尉未赴辟襄陽府司法叅軍

府捕強盜陳大漢等十三人不獲鄉民羣行適符其數
巡尉執送官不堪笞掠皆誣服公約法疑之白帥移獄
已而楚州獲真盜闔府嗟異戶部尚書張澄吏事精明
禮部侍郎陳桷號醇正相繼來守屬吏奉承不暇惟公
遇事爭辨不屈桷常曰司法哭兀長身他日真御史也
自是有蕭御史之名二十年用薦者陞從事郎知歸州
秭歸縣縣產椒漆蜜蠟部使者科買無藝公一切拒之
境有瀧湫洞歲旱羣禱雨不應公禱輒應民號知縣雨

境文林郎調建康府觀察推官舒州惡少張天錫父子五人夜投宿僧寺僧不敢納天錫踰垣殺僧屢鞫不承遷延數年株連者多死詔江東選官鞫治公至天錫即伏辜武臣梁俊彥獻議增沙田蘆場稅詔同金部員外郎莫濛按視勢醵張甚至叱責轉運使公不為動稅以不增金陵大府貴游子弟多在焉又常守以大僚郡事綱舉而已幕職曹掾官日夜縱歌呼往往踰越法度諸司畧不謹何公獨介然居中時箴切之受納秋苗例別

給餐錢公謝不受守固謂公無妨他人公盡以修官廨
戶部尚書韓仲通以法律進其居守也御僚吏嚴甚無
敢可否事民有刀傷盜桑者盜投環死吏當其主故殺
已具公抗執不書仲通初大怒已乃薦公改秩時公在
選調踰二十年未嘗求之於人將代舉將猶闕府僚數
十人列誦其賢於留守樞密王公綸王公為成之改左
宣教郎知興國軍大冶縣三十一年完顏亮渝盟上司
籍民為兵日役數千人冒雪植暗椿鹿角寨為防江計

公度不足恃徒困民力亟請散遣上司不能奪明年兵解以疾去官隆興改元復知建寧府建陽縣邑大難治自政和以來閱五十餘令終更者纔七人公至務以禮義化其俗民翕然順從至繪像刻文紀公善政乾道元年轉奉議郎未幾賜五品服三年選為幹辦行在諸軍審計司未上有詔舉御史大臣以公名聞五年四月召對便殿論正風俗上曰正風俗當何先公曰仁祖時朝臣以危言讜論為忠偷合苟容為恥故風俗醇正崇寧

大觀而後反是在陛下示之好惡耳上曰誠如卿言明日除監察御史六年轉承議郎七年六月輪對言人心之於國猶身之元氣今欲土彊其本在結人心譬之良醫治病必先護養元氣乃可攻疾此非書生空言孫吳論兵亦出於此上曰所謂一日道而孟子亦云不嗜殺人者能一之又乞減冗費省冗兵上皆嘉納八年正月秀州華亭捍海堰成命公按視公還奏縣之四鄉鹹水壞田乞蠲賦稅三年上從之三月臺諫官皆坐論執政

奉祠去上以公分察歲久見謂直諒擢拜殿中侍御史
公感激思報為上言治亂安危由言路通塞願備其官
假以事權毋使風采消沮又言前歲浙西夏澇秋旱江
湖淮南歲比不登民多流離今正陽之月天多沉陰寒
氣慘慄是謂常寒側身修行茲其時矣因繳進富文忠
公熙寧初奏議上曰富弼所論誠實有愛君憂國之心
公知上聽納即䟽言漢災異策免三公今宰相名任恢
復實為持祿保位計變理乖方既不引咎聞人言災異

輒肆怒罵陛下昨許六察言事今乃令求實跡專務蔽
關聰明二三年來莫敢言其失併奏擅權不公等事上
曰卿所論甚當可謂稱職於是宰相上章請去縉紳喜
曰鳳鳴朝陽矣會宰相復留乃除公直秘閣提點江東
刑獄制詞有剛方不撓質直而明造膝之辭有犯無隱
正人去國豈朕所欲之語蓋在職纔四旬所論如此直
聲遂聞於天下既至江左郡守多要官公舉刺各一人
上皆罷行之所部肅然淳熙元年轉朝奉郎召為太府

少卿公奏臣奉使無補何以復召上曰思卿直諒耳公奏提刑置文武非是互用一負足矣又論經總制錢及額則賞是誘其求增羨也請罷之又奏諸路水旱頻仍今歲僅得中熟而七月錢塘風潮壞堤岸居民死者數千人災異在遠尚不可忽況都門之外乎又九月壬子距立冬纔數日雷晝夜發聲亦非休徵惟益修德政轉禍為福上曰卿直諒之氣殊不衰未浹日兼權禮部侍郎進司農卿明年三月遷國子祭酒太學之士以得明

師交相賀先自職事闕請托紛然公籍校定優劣升補
先後為之格遇闕則察行藝次第而授奔競頓絕舊制
職事官例牒宗族補試是歲公自長官臨涖令二子毋
得入其後學官子弟中國子生者皆駁放始服公之先
見頃之諫官論職名不當輕授公適引疾求去八月以
本官提點浙西刑獄陞辭奏曰周公作無逸大槩言畏
天恤民和衆勤邦儉家省躬罪已有容德具此八善自
然保壽無彊今會慶節不遠臣當需次阻奉萬年之觴

願以此言為獻又乞禁止外路獻羨餘又錄蘓文忠公
治道篇以進曰陛下既嘗置軾文座隅更願熟復此篇
以發聖學上皆稱美相與論無逸蘓文數百言三年改
除湖南轉運副使道州江華縣稅重民瘠大軍錢三千
緡上供米八百餘斛力不能辦公奏免之四年上以公
舊常帶職超進秘閣修撰官吏畏公之正爭檢身恤下
湖南之民陰受其賜不可計公方厲志澄清欲徧行郡
邑而病日侵上書丐祠得主管建寧府武夷山冲佑觀

勅牒未至八月丙戌卒於官舍享年六十六訃聞致仕
恩外特用前郊恩又官其一子蓋異數也士大夫識與
不識皆太息鄉人至出涕相弔六年正月壬午葬於彭
澤鄉加堰里小桂山之原娶同郡項氏天裕之女封安
人生三子長曰顥前卒顥碩皆能世其家顥復以官遜
其兄之子四女長適迪功郎筠州司戶叅軍李景範次
適進士張元觀次以疾居家次適鄉貢進士曹彥約孫
男四人必誠必簡必聞必蕃女三人曾孫男一人公剛

塞強毅是其天性處心積慮公而不私平居聞時政之善若賢才進用輒歡忭贊美不啻如已有得至遇姦邪欺誕之人直欲折其頭角身之去就禍福弗計也所至以廉介稱一毫不取諸人其自奉有布衣所難能者當官毅然初若寡合及與人交表裏殫盡終始如一遇觴詠從容時溫乎可親也素無嗜好惟聚書數千卷讀之不倦每見歷代及本朝名卿奏議剴切平正者輒三復慨歎恥躬不逮尤慕司馬文正公之誠實蘓文忠公之

議論二書手不停披暗誦數百尤樂為晚進道之其後
正色立朝不諂不瀆淵源盖有所自紹興末都民望為
右正言公移書云司馬公倅併州猶上儲議且以告諫
官范蜀公今足下實任言責事有急於此者乎民望欲
薦公會卒侍御史周揆又欲扳公入臺復以他遷不果
晚自受上知自謂可行所學不忍用細故塞責彈擊自
宰相始上深察其忠顧勢不兩立姑聽外補未幾竟易
相召公歲中數遷而公病不能留旋齋志以沒豈非命

與初公仕不逮親故於同產尤極友愛常分俸給二弟力教孝弟之美後亦登進士第今為奉議郎知蘄水縣公雅留意於易博問精思所得深遠暇日喜賦詩未第時都昌宰郭彥叅尉李鼎頗工詞章與公相琢磨詩名遂著公沒二子既哀遺文為三十卷復以蘄水君所狀遺事不遠千里謁銘於予予昔分教金陵實與公同僚方他人遊戲相追逐公必過予清談終日於今蓋二十年中雖同朝者再而無前日之歎矣聞公云亡殄瘁是

悲豈特念舊而已哉銘曰

維昔陽城

安貧篤學

振迹言路

鳳鳴諤諤

乃官成均

士化端慤

乃刺道州

聲隱衡岳

天生斯人

艱矣難數

侃侃蕭公

文敏而樸

或塞或通

守道彌確

礪兮真清

蛻於衆濁

以配前修

誰謂其邈

銘歲諸幽

亦詔後覺

朝請大夫致仕賜紫金魚袋黃公子游墓誌銘

淳熙五年

公諱子游字叔言系出浦城黃氏號閩中著姓五世祖
元吉事江南李氏有詩名生全州司理叅軍觀登大中
祥符元年甲科司理生太常博士孝先楊文公之甥尤
深於詩蘓文忠公所謂一唱三歎者也亦以進士入官
所至輒平反疑獄卒官博州貧不能歸卜葬陳之宛邱
尚書左丞蒲公宗孟誌其墓子孫遂家宛邱後贈銀青

光祿大夫於公為曾大父妣建安郡夫人章氏銀青生
朝散郎知潁州贈通議大夫好謙與二蘓同登科通婚
姻蘓公謂孝友如曾閔者娶陳氏章氏皆贈碩人潁州
生承事郎宰崇寧星變應詔上封事極論左右蒙蔽宰
相蔡京切齒劾以誣罔不道逮付御史獄長流海島紹
興初特贈直秘閣累贈右金紫光祿大夫即公之父也
母大寧郡夫人章氏公積厚源遠鍾美聚粹以慈祥之
性濟明敏之資少從伯父待制實蔭為假承務郎金紫

之就逮也兄弟訟寃於朝乞納告身贖罪權臣滋怒公號詐益力父得不死由是知名大觀三年八寶恩循登仕郎調相州儀曹郡寮負官錢六百萬守委公拘係公哀其窮縱之使逸守義之為蠲其逋建炎初客南京歐陽澈以上書忤宰相棄市公適同邸收而葬之其子飛英年十四公傾囊輟所乘馬贈其歸棣州軍亂殘通判邵某家而誣以謀反邵子在鄉懼有後命公為白其寃於本道轉運使竟官其三子未幾版授潁州汝陰令時

軍需繁挈雖許預借夏稅而歲迫暮不能辦縣帑貯和
買錢數萬緡公欲發之郡守不可公乃召民諭之曰某
戶當受錢買絹若干今計汝所輸夏稅留錢而給鈔汝
歸徐以絹來公私大以為便守下其法於諸邑四年避
地歸閩道由嚴州之朱村土豪守險者臨公以兵老幼
駭竄盡掠其貲事定太守柳約將以軍法窮治公力止
之朱村人繪像以報紹興元年入監左藏西庫車駕自
紹興移蹕臨安公請銜命先渡江經度臺省倉庫所寓

畫圖以進後皆不易權度支郎官丞相呂忠穆公都督
諸軍擢公江東轉運判官兼隨軍轉運副使以勞陞進
秩一等公諉功同僚俞侯侯亦進秩人多其遜會安撫
使與公有憾密奏公興乏罪且不測叅知政事沈公與
求曰詎有方被賞遽曠職者且軍前無奏而他司僂言
必讒也已而果然猶坐奪一官會江西新羅劇盜朝廷
知公仁恕選提點本路刑獄未赴改知台州徙池州台
產鹽池產茶姦叕囊橐其中重法不能禁公治以輕典

人不忍犯在池二年獄無重囚屬縣曰青陽僞唐以為
宋齊丘食邑後因田租立稅額其重十倍公代還奏曰
國家涵養斯民二百年矣忍使青陽獨用李氏弊法乎
詔裁其半民為立祠奉事至今久之求浙東安撫司叅
謀官以歸自是主管台州崇道觀者五稔遂致其仕積
官右朝請大夫賜服金紫以乾道三年某月某日卒於
正寢享年八十有八娶武氏左正議大夫珣之女先公
三年卒初公卜壽藏於鄞縣豐樂鄉金鵝山是歲十二

月九日與武氏合葬馬三子仁傑右文林郎監臨安府
軍資庫仁儉文林郎新處州青田丞仁修從政郎南康
軍樂錄事叅軍孫男七人直與終迪功郎直清將仕郎
直已直益直行直愛直正女二人長嫁進士吳鐸之次
許嫁進士陳經曾孫男女各八人公家傳孝友勇於義
而安於仁處事未嘗動聲色而曲折中理所居官咸可
稱道靖康之亂挈內外族姻數百指展轉兵間以身任
其寒饑晚卜居明州奉化縣築聽堂橘隱齋兄弟四人

華顛相從歲時燕樂孫曾滿前百順且備官薄當選置
而不言遇大禮捨其孫而官猶子又竭貲以嫁兄之諸
孫閨門雍睦和氣可掬下至奴隸亦得其歡心尤善與
人交親踈一接以禮士大夫識與不識皆稱公為長者
丞相張忠獻公每對誦言調歐陽事以為今無此人矣
公感知已歲遣介問忠獻公於遷謫中其忠厚大率類
此公既沒十一年三子惟仁儉在屢以承議郎王度之
狀來請銘惟某族姑歸公兄之子仁術蓋依公以居者

故不待識公而知其行義詳矣振宣幽光宜無愧辭銘

曰

浦城之黃

世有君子

公承以仁

允謂濟美

祿雖不多

而壽則遐

嗟爾後人

益保厥家

文忠集卷三十三

欽定四庫全書

集部

文忠集卷三十四至
七

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李 巖

謄錄監生_臣于希賢

欽定四庫全書

文忠集卷三十四

省齋文稿三十四

宋 周必大 撰

墓誌銘

直敷文閣致仕魯公嘗墓誌銘

淳熙五年

紹興初魯如晦季欽兄弟問學詞章一時競爽名卿毗陵張公守胡公世將爭為延譽或比之二陸已而同奏名禮部別院既仕各以議論才術自見為郎為卿為郡

守監司職業交舉天子器之

闕

至先後掛其冠里居康

寧瀕八十乃終洪範五福蓋庶幾焉乾道中如晦沒李
欽屬予銘其藏李欽之葬也二子復以為請何可辭公
名嘗字季欽世為秀州嘉興人徙海鹽之武原曾祖延
厚祖惟辨父贈正議大夫壽寧妣碩人劉氏公起家左
迪功郎臨安府餘杭縣主簿以正議年高求監潭州南
嶽廟未幾遂丁憂免喪為廣德軍教授陞從政郎時宰
有雅故公不深求僅得台州教授用薦者改宣教郎知

衢州江山縣爭訟數十年不決者公曉以義理多感泣
愧謝縣舊科糴本乾薑羊錢三萬緡二十六年有詔蠲
免而州家用不足別取之民公經畫權酤以其贏代橫
歛公私便之守言諸朝下其法他邑遷奉議郎大宗正
司主管財用分治於越三十一年明堂赦恩賜五品服
上登極用如晦主管官告院請覈空名告身在諸軍者
冒濫頓革擢國子監丞未上改太常丞隆興二年冬召
對論人主當法堯舜及言文武未盡其用百司不守法

度天語稱獎拜監察御史公以左相陳文恭公叅政錢公端禮姻舊固辭上謂二公曰言親擢何辭二公言典故不可違欲用言豈無他官乃改吏部員外郎是歲浙東西水災民大饑疫詔郡邑振濟選郎官察之公使浙西所過發倉廩人人被實惠具施行次第歸報又陳荒政六事上甚嘉納特遷一官嘗攝右史侍立上顧左右稱其儀矩凝重且有端人之目俄進太府少卿輪對及治道機要上曰卿老成今處司府凡事宜盡誠退即條

奏文書牴牾事上諭宰相如魯嘗留意職事何患不治
兼權大理少卿公益感激奮勵遇事可言不以非其責
弗言如論海道備禦蕃舶事宜緡錢會子輕重相權催
科綱運致弊不一咸得要領至言徇私植黨請謁交通
辭尤激切會舉行出入更迭之制公在卿寺蓋二年矣
首請補外除直敷文閣江西轉運副使所部適旱詔趨
行隨以璽書詢管下雨澤何如公夙夜布宣上德歲以
不歉作卷雨樓於廳側自為之記本道上供米九十餘

萬斛歲費錢十餘萬繕造運舟於贛吉其來已久使臣
綱稍積習侵盜甚則鑿舟沉之大率數年輒欠三十萬
斛惟江袁興國建昌四郡專募客舟未嘗損也公具以
聞詔官舟客舟均用湏歲終較其利害徐議更制公乃
捐枋木錢助諸州雇舟又蠲民間水脚錢十一萬緡即
漕臺置艘二百備其闕而贛吉船塢遂罷徙浙東提點
刑獄公事又徙閩路公已倦遊力請奉祠得主管台州
崇道觀遂致仕官至朝請郎公之自廣德歸也大闢園

圃手自種植名曰日涉至是殆三十年木皆成陰亭榭
增葺公日從容其間歲時釀酒會賓客鄰里以為笑樂
名士多賦詩美之淳熙二年八月十日以微疾卒前三
日猶秉筆作文臨終精神不亂其所養如此享年七十
有七先娶陳氏朝議大夫正原之女繼室以其媚蓋忠
肅公族也再娶曹氏武惠王之後亦前卒皆贈恭人三
子可宗登隆興元年進士第後又中博學宏詞科終修
職郎南外敦宗院教授人皆惜之可羣迪功郎監潭州

南嶽廟可舉將仕郎五女長適朝奉郎知德安府周頤
次適迪功郎監秀州支鹽倉陳綱次適國學進士胡懷
祖次適迪功郎廣德軍建平縣主簿葉嚴次在室孫男
五人符籥筌策節孫女八人長適迪功郎監行在編估
打套局閻黃聞餘尚幼曾孫男女三人初公卜地於湖
州武康縣慶安鄉後汪村之原規畫兆域旁築息菴隨
一相堂環以松竹扁舟時至其上公既沒二子公力學
強記年十二下筆驚人入京師太學每從儒先質疑義

聞見日廣刻意古文恥作蹈襲語下至尺牘亦可觀喜
論天下事廷對述安危治亂邊防形勢甚備兩上萬言
書極陳利病當官務行所學必欲事事辦治平居喜稱
人善而覆匿其短貌莊氣和輕財重義勤於接物少老
如一著述有易說二十卷論語解十卷蒙溪已矣集四
十五卷後集二十卷湏江雜著六卷會稽唱酬二卷芻
狗集十卷芻蕘編十卷南征錄二卷自警錄四卷編集
祖宗訓典五十卷編注杜少陵詩十八卷又年譜一卷

昔予攝承詞掖公由會稽入朝袖詩數十篇為贄格律
高妙予竊敬焉其後公持節按行廬陵遠訪予於郊野
自是問訊無虛歲情好滋合非特以葭莩之故也既序
公出處又系之以銘曰

降才本天

成之者人

如彼良疇

勉其耕耘

歲有饑穰

我無振貧

敏乎魯公

能濟以勤

既裕其政

亦昌其文

既食其實

亦彰厥名

有始有終

以沒元身

肇營新宮

山環水縈

生樂斯邱

死反其真

我為銘詩

式穀雲初

武昌簽判尚宗簿大伸墓誌銘

淳熙六年

公姓尚氏相州安陽人世以武勇聞左金吾衛大將軍
贈本衛上將軍諱從諫者公之曾祖也生二子分習文
武業其一掌麟府軍馬號名將其一以累舉人官贈大
中大夫諱裴者公之祖也父諱佐均博學工文章登進

士第歷校書郎禮部郎官國子司業祭酒終朝請大夫
直龍圖閣後贈某官亦生二子長大倫終迪功郎公其
季也諱大伸字長道以父任為將仕郎紹興五年補右
迪功郎監西京中嶽廟版授臨江軍新塗尉調吉州司
戶叅軍用新塗捕盜賞改承務郎權知贛州安遠瑞金
兩縣又權筠州之上高皆用治辦聞以母夫人杜氏年
高求監饒州景德鎮視事不一月丁杜夫人憂時二十
五年七月也服闋知贛州寧都縣賜緋衣銀魚秩滿簽

書威武軍節度判官廳公事西外宗正簿又佐武昌軍
淳熙五年閏夏大暑人多病癰疽公亦瘍發於背庸醫
妄投藥再旬不瘳公志氣安定手書後事諄諄七月十
六日坐而逝得年六十有二惟吾伯母實公之娣靖康
兵亂公年尚幼依伯父入蜀亂定來江南伯父謂我女
兄早孤而賢命歸公重兩家之好險阻艱難殆三十年
共立尚氏之門戶是生四男振祖振英振操振德女長
適從事郎田橡次適將仕郎羅尚賢次在室餘夭公自

為兒童時儻有大志遇事智畧常出人上少長氣貌
瓌特議論宏偉未三十即治劇邑吏懷奸欺來前輒迎
毀其機牙咸懾不得發頑民屏息善良吐氣推心腹待
僚佐有不合面折之已乃懽然未嘗虞其怨也性不樂
軟熟媚耳目每與上官辨曲直爭利害坐是抑厭不進
益懷竒負氣閉門讀書晝抄夕校忘寢廢食聞有與編
隱帙百方求之以故博古多聞所至屈其坐人尤嗜資
治通鑑編類數四往往成誦有來問者應答如流平生

喜劇飲當酣適時談諧貫古今志意薄霄漢聽者欣聳
雅工詩下筆滾滾數百言其豪邁慕李太白精博學李
義山而思致綿麗又效溫飛卿至其得意處自謂不減
古人今有家集十五卷和陶詩一卷存焉初公以宣和
六年補官五十年間輩行皆至大官公纔為承議郎當
上考功課進朝奉階延賞於後乃不能待然公苦心教
子家四壁立縮衣食之奉招致館客又躬督其課程夜
以繼日振英已嘗舉於鄉矣詎知造物不使諸子益奮

於學自致名宦寧失於此將得於彼耶公輕財重義周
急不計有無雖甚珍愛之物人或稱美與之無吝色身
後僅餘圖書好玩數簾而已歲在丙戌女兄即世公即
卜地於吉州廬陵縣某鄉之原置雙穴焉一星終而公
歿諸子乃以是年某月某日敬承治命奉柩合窆遠來
求銘泣而銘之曰

太阿久柙

用乃缺兮

驂騑久絀

進乃蹶兮

命實制之

非我絀兮

生雖有涯 名不可滅兮

恭州太守任君續墓誌銘

淳熙六年

君諱續字似之潼川郫縣人系出漢廣阿懿侯敖懿後
十六世為晉安東將軍顯顯九為隋潯陽太守壁謫祿
間中以死子孫因家焉壁生頴頴生業業生雅相相唐
高宗其曾孫畹疇皆達官太和中詔以二龍旌其門畹生
椿嘗叅梓州軍遂徙郪之興城椿生韜符韜符生崇誥
崇誥生琦琦生仲簡仲簡生伯傳登景祐五年乙科仕

至尚書都官郎中是為君之曾祖都官生庾終普州司理司理生忠原朝請大夫知黎州君之祖與父也文獻相承衣冠不絕蜀人論氏族者推焉君少以父任為將仕郎父疾革戒君曰興城之任世以儒科顯爾不可忘命易今名字君泣拜而志紹興七年起家為漢州雒縣尉十三年又尉昌之永川夙夜銜父訓懼從事不能卒業十九年求監潭州南嶽廟二十一年遂中進士第選澧州州學教授晨策羸馬從一僮謁守丞退則繙校遺

編盡日與聖賢對他無所問當路交薦二十八年自承
直郎改左奉議郎復求開州教授而去龍興元年就遷
夔路轉運司主管文字朝廷歲縻緡錢數百萬市馬川
陝歷梁洋下襄郢山行險遠道斃之餘至臨安者皆骨
立有大吏請治舟峽中乘漲水載馬東下既駛且安詔
從之無何官吏奉行弗虔效牽者又加迫促資糧芻粟
篙師櫂夫一切取辦於民急若星火州縣大擾乾道二
年春君適還朝上疏言請調他道禁旅分屯夔峽代民

駕舟事已數閱如故異時荆楚出師北伐亦可為上流
聲援召對下其說君因論三事曰大臣雖罷政當體國
安得苟自便安宜使分守邊要漢部刺史察舉二千石
今監司專繩小吏夔鹽惡而直倍漕敷州州縣計口
抑民瘡痍一道上嘉納之擢守涪州未上易恭州四年
春蜀大旱常平義倉素空竭奸民姚京紿言官廩有餘
誘致四方流冗冀以倡亂君知其謀既按京抵罪即捐
俸錢五十萬募民入粟闔境爭勸趨之饘粥廬舍規畫

有序至者如歸帖帖無事壁山有淫祠民病輒解牛以祭君下令禁止訛言神云守奪吾祀民與牛皆將疫死郡人大恐君知廟巫實導之繫郡獄巫駭服巴縣令貪虐君劾去之其子飛謗於朝言者因論君前議舟師為迎合八月罷郡事六年夏主管台州崇道觀命至而君以疾卒於左綿實九月戊子也淳熙丙申冬葬仙雲山之下得年五十有七積官左朝奉大夫君靜重廉介篤學喜為文身修家齊勇於為義嘗傾產以調娉媼教養

孤甥迄有成立仕官三十年先疇一無所增身後妻子假貸以歛君凡四娶二李氏鮮于氏皆贈宜人今夫人王氏御史利用之女有賢稱子男七人義山興元府西縣尉義問義路義舉義端義明義正正女三人一嫁文林郎馮適之一嫁進士鮮于糾宗一尚幼所著書號仙雲集者二十卷又有任氏春秋十五卷春秋五始五禮論五卷篆隸石刻譜三十卷歲戊寅冬十月君調盛山教官過金陵予分教在焉以同年進士置酒道舊見其

氣貌瓌偉議論慷慨意其必為世用孰謂君止此也比
歲識其子義問於行在所博學能文興篇隱帙問無不
知君可謂有後矣任氏其興乎義問將還蜀出石泉太
守章森狀君之行實乞銘於予義不可辭銘曰

謂君窮時既逢謂君通志弗克德之洪報也豐劬爾
躬後其隆

朝散大夫直秘閣陳公從古墓誌銘

淳熙十一年

自古有志功名之士常患其才無以高世才高矣未必

逢其時時逢矣未必皆為主知幸而見知則摩九霄撫四海非難也然而將起輒仆未耄遽沒茲非命與嗟吾希顏不幸乃如此交友聞而悲之況予先大父與希顏之大父為年進士予又綴名希顏榜中在期集所日日相從間雖出處不齊而契愛厚矣晚預政中書每聽玉音論當世人物必才希顏顧不能悉力薦引使以所長大顯於世則夫悼惜愧惜豈止同於衆人而已今其仲子縑經來告曰先君葬有日不肖孤捨几筵而銘是求

成遺志也將紓予悲不在茲乎乃序而銘之希顏姓陳氏諱從古系出漢文範先生文範生諶諶生忠忠生佐佐生伯珍晉建興中渡江居曲阿新豐湖即今鎮江府金壇縣境也故君為金壇人曾祖廓熙寧九年進士仕至朝奉大夫利州路提點刑獄事祖瑛登第在元符三年終文林郎知真州揚子縣父維婁貢禮部竟以特恩入官主信之弋陽簿後贈朝請大夫君天資雋敏兒童時應對賓客有成人風稍長自力於學為文辨麗閎壯

儒先交舉之紹興二十一年中進士第弋陽府君喜曰
世業有傳足澡吾恥調臨安之富陽尉秩滿用賞改左
宣教郎為邵州州學教授殿中侍御史張震議扳君入
臺會遷中書舍人而止入監左藏東庫未上丁弋陽憂
免喪監行在權貨務都茶場丞相虞雍公問君終歲出
納幾何君曰國家利源鹺茗居半自合同關子行遂虧
常額丞相命君即都堂條救弊之策於是關子罷而歲
入增矣都城浚運河丁夫輦泥積務門君爭曰隙地以

遠大災室之可乎尹恃勢弗聽君朝衣坐泥中上聞之
夜半為降旨禁戢已而車駕閱武近郊君進詩五十韻
姓名益簡上心命措置浙西鹽事以勞擢司農寺主簿
坐法免旋起知蘄州赴闕奏事上曰卿書生能通世務
昨宣力務場為多獎勞久之到郡期月上以湖南歲比
不登選君提點刑獄始至衡陽民有被誣以淫祠殺人
者更三歲不決君奏釋之詔下而雨教官作平反堂記
紀其事時乾道七年也十二月就除本路轉運判官以

明年二月視事專任荒政蠲欠以萬計御札令同帥臣
收養貧民所棄嬰兒悉心奉行楚人多德之夏秋復憫
雨精禱嶽鎮遂大有年武岡徭人憑恃谿谷創立樓櫓
議者欲以兵問罪君曰往連不稔彼迫饑餓為保聚計
耳今可文告定也遣吏鑄誥酋長帖帖聽命其後長沙
水溢穿城郭敗廬舍君督吏卒䟽理池隍計戶給土木
費人忘其災事聞復下璽書問狀併論賑濟功特除直
秘閣是冬京西謀帥上閱諸道監司姓名指君曰陳某

有才無以易之九年正月開府於襄即奏言朝廷以襄
為上游重地增裨益成緩急許調鄂師善矣但節制不
一莫知適從紹興隆興間嘗萃荆鄂兩軍於此分地以
守東盡隨與夷陽鄂帥趙樽主之西盡均州光化軍荆
帥王宣主之權均力敵各行其說樽欲持重宣欲轉戰
此不立統帥莫相臨制之失也今若合為一軍擇宿將
為都統制屯武昌置副帥屯襄陽或一年許其更戍則
號令歸一無敢首尾誤國矣疏入上適有此意四月乃

用吳玠為荆鄂駐劄諸軍都統制而王世雄副之分治荆南其後荆南軍竟更戍襄陽至今以為便北界有判者來敵以兵壓境或請增戍受降君固執不可獨榜禁上示無招接意敵兵遂退上謂丞相曰從古倉猝應變足消疑沮之謀可諭此意以獎之淳熙改元復坐論列而罷二年春主管台州崇道觀自是閒廢者九歲上眷之不衰鑄錢使者嘗缺召君欲用之繼即其家連畀衢饒秀三州印綬皆不果行君自知數奇願復食祠祿朝

廷為修廢官差主管南京鴻慶宮卜築洮河上奉親教
子之餘猶孜孜國事時有所見聞輒論著告於有位鄉
邦存饑周恤甚勤居閒好客酒後談論激烈聽者忘倦
自高曾以來世工篇什君及從呂居仁尚伯恭蘓養直
游往往得其句法尤愛陳去非詩取簡齋集盡次其韻
裒古今詠梅自鮑參軍而下迄近世名公得古律千餘
篇次第屬和豐腴清婉兼備衆體無支詞複語駕幸秘
閣君自以寓直其間奏百鈞詩以賀詔與宰執侍從等

所進同付史館縉紳以為寵九年秋以事如城中八月二十日還至半途遇疾而逝於是母夫人潭氏八十六矣君孝而不得終養是尤可悲也積官朝散大夫得年六十有一娶薛氏承議郎諸王宮大小學教授璿之女時年二十四逮事尊嫜孝謹知書宗族稱賢再封安人前君九年卒追贈宜人五男子伯震從事郎監江陵府糧料院仲吳以致仕恩補將仕郎叔謙季益季咸未仕女適從事郎興國軍判官趙師沔孫男女四人伯震等

卜以十年十一月二十九日葬君本縣唐安鄉茂城之
原舉薛宜人柩祔焉其地介於祖考三塋間銘曰

孝友以為質詩書以為輔科名世其家才術知乎主
天於希顏可謂厚其賦予矣既黼黻之又齟齬之竟
何取哉竟何補哉

文忠集卷三十四